

## lis Gnovis

■ **CONCUARDIE.** Fiestis aquileiesis

Vie pal mès di Avost, la Glesie furlane e celebre cinc sagris impuartantons. Ai 3 di Avost, e cole la fieste di San Stiefin, ch'al è prin protetôr de Glesie di Concuardie-Pordenon e titulâr de glesie catedral di Concuardie. Tal indoman, ai 4 di Avost, la Diocesi dal Friûl occidentâl e celebre ancje la dedicazion de sò prime catedral, al ven a stâi la «Basilica Apostolorum» concuardiese, screade dal Sant vescul Cromazi, vie pal IV secul. Ai 13 di Avost, e cole la fieste dai Martars aquileies Feliç e Fortunât. Te stesse di, si onore ancje il Sant capucin Marc di Davian (1631-1699), proclamât Beât di Zuan Pauli II, ai 27 di Avrîl dal 2003. La Madone di Avost, alfin, e sarà onorade ancje come prime titulâr de basiliche patriarçjal di Aquilee.

■ **PONTEBE.** Fûcs su lis Alps

E je començade l'organizazion da la manifestazion ambientaliste internazionâl «Fûcs su lis Alps / Feuer in den Alpen», pal 2021. Lis fugheris a saran impiadis in dutis lis regions alpinis, ai 14 di Avost, par demandâ atenzion e impegn su la cuistion dal «Belanç idric tal mudament climatic». Par informâsi su l'iniziativa e par dâsi in note pe organizazion di un pignarûl, si varà di scrutinâ il lûc internet: <http://feuerindenalpen.com>.

■ **SPILIMBERC.** «Mosaico&Mosaici» 2021

La Scuele Mosaiciscj dal Friûl di Spilimberc, dai 30 di Lui ai 29 di Avost, e torne a proponi la rassegne des oparis dai siei scuelârs, compidis vie pal an formatif 2020-2021, «Mosaico&Mosaici». L'esposizion e sarà screade a 18.30 di vinars ai 30 di Lui, li de Scuele, te strade Corridoni. Lis visitis a saran programadis ducj i dis di 10 a misdi e mieç e di 16.30 a 20 ([www.scuolamosaicisti.it](http://www.scuolamosaicisti.it)).

■ **CJAULIS.** Apontaments cu l'archeologie

Miercus ai 4 di Avost, si scree a Cjaulis di Verzegnis la XXXII edizion de rassegne culturâl «Agosto archeologico», inmaneade de clape «Carnia Cultura», cul jutori de Sorintindince. A saran proponudis siet convignis, ancje tes vilis di Dimpeç (ai 7), di Zui (ai 11 e ai 17), di Davâr (ai 13) e di Denemonç (ai 19). L'ultin apontament al sarà chel di Tumieç, li dal Museu cjargnel. I apontaments a tacaran a 18, gjavât chel su la sculture di len, ch'al començarà a 21, a Denemonç. Par informazions: 347 9620699 o [carnia.cultura@gmail.com](mailto:carnia.cultura@gmail.com).

<b>Miercus 4</b>	S. Zuan M. Vianney	<b>Domenie 8</b>	S. Domeni di Guzmàn
<b>Joibe 5</b>	S. Svualt Re m.	<b>Lunis 9</b>	S. Taresie
<b>Vinars 6</b>	Trasfigurazion dal Signôr	<b>Martars 10</b>	S. Laurinç m.
<b>Sabide 7</b>	S. Gaetan di Thiene	<b>Il timp</b>	Plois frequentis



**Il soreli**  
Ai 4 al iève aes 5.53  
e al va a mont aes 20.33.



**La lune**  
Ai 8 Lune gnove.

**Il proverbi**  
Se tu vûs comandâ, fradi, impare a ubidi.

**Lis voris dal mès**  
Cjapait sù patatis, anguriis, melons  
e pomodoros, di mangjâ o par fâ conservis.

## Marimont san. Int sane

«O vin i mieç.  
E je ore di operâ»

«**C**uant che i catolics a son unîts e ch'a vivin seont religjon, a sucedin spettacui. Al baste cjâlât cemût che «Laudato si'» di Pape Francesc e à disveât i catolics di dut il mont: cun cheste convinzion, il «Moviment catolic mondiâl pe clime» al è partît cuntune mobilitazion gnove.

Di cualchi setemane, su la rêt des rêts si pues firmâ la petizion «Pianeta Sano, Persone Sane» – [TheCatholicPetition.org/it](http://TheCatholicPetition.org/it) –, ch'è sarâ scuarzude ai soestants di dut il mont par ch'a fasin la part dal so dovè, cuant che si daran dongje, in Chine tal mès di Otubar, pe convigne internazionâl «Cop 15» su la Biodiversità, e a Glasgow tal mès di Novembar, pe «Cop 26» su la Crisi climatiche.

Seont il «Moviment catolic mondiâl pe clime», i cristians a àn di esprimisi a dute vòs, par che lis personis plui menaçadis a sedin scoltadis. Il fin al è chel di tirâ sù daurman milions di firmis. L'apel al sarà consegnât, prin di dut, ai presidents des dôs convignis internazionâls, Li Ganjie e Alok Sharma, ma po al varà di rivâ a ducj i lidêrs dal mont.

«Noaltris catolics e altre int di religjon us implorin di operâ daurman a pro di dut il Creât, daûr di ce ch'e pant la sience», al ribat il document di firmâ. «La nestre Cjase comugnâl e la famee dai popui a patissin. La crisi di Covid-19 e je stade l'ultin speli da l'emergence ecologjiche». Se i umign no tegnin cont de nature – al note l'apel – la nature no rivarà a curâju gran. «La biodiversità e je daûr a sfantâsi



Il placat ch'al polarize l'apel «Marimont san. Int sane»

I cristians – seont il «Moviment catolic mondiâl pe clime» – a àn di «deventâ il mudament ch'al covente»

par man de umanità. I biolics a calcolin che si è daûr a causionâ estinzions mil voltis plui rapidis di ce ch'al sucedarès cence influencis umanis. In chel fra timp, une Crisi climatiche simpri plui grivie e provoche l'incressite dal nivel dal mâr e cundizions meteorologjichis simpri plui estremis, ch'a fischin vitis e mieçs di sostentament. Ceste crisi e à un impat une vore negatîf su lis nestris sûrs e sui nestris fradis plui biâts, che no àn fat nuie par inviâl. Ma nissun, tant e tant, par o siôr, nol podarà parâsi. La Crisi climatiche e il crac de Biodiversità a son crisis zimulis». Pal «Moviment catolic mondiâl pe clime», «i soestants mondiâi a àn ancjemò di tacâ a operâ in mût proporzonât a lis necessitâts científichis e ecologjichis». Par chel, l'apel (destinât ancje ai lidêrs dal «G7» e dal «G20») al domande di ricognossi in mût clâr che i mudaments climatics e chei de Biodiversità a son part di chê stesse crisi e ch'è covente

un'azion ambizionose, integrate e rivoluzionarie; di meti in vore il Compatât di Paris par fermâ il riscaldament globâl sot di un grât e mieç Celsius e di stabili come obietif globâl di conservazion de Biodiversità il 50% des tieris e des aghis e la gjestion sostenibil dal rest; di ameti il debit ecologjic dai País plui siôrs, ch'a àn di riformâ il sisteme finanziari e di scancelâ il debit mondiâl. Par rivâ chescj obietifs, i guviers a scuegnin meti in zornade i obietifs statâi; mantignî lis impromissions, judant i País plui puars a frontâ l'adatament, la mitigazion e i dams patîts; catalizâ la trasformazion, fermant il sfrutament des energjis fossilis e dirotant i finanziaments viers lis energjis rinovabilis e l'agricolture ecologjiche; e garantî il primât dai dirits dai popui natîfs e des Comunitâts locâls te azion pe clime e pe Biodiversità.

Mario Zili

## Peraulis in dismentie par cure di Mario Martinis

❖ **SBELET**

s.m. = belletto (per esempio il rossetto)  
(dal verbo sbeletâ "imbellettare", a sua volta formato dal prefisso s- e dal verbo imbellettare)

Mi fâstu provâ chel sbelet ca, par plasê?  
Mi fai provare questo rossetto, per piacere?

❖ **SBIGHET**

s.m. = sbieco, traverso  
(dalle parole obliquus "storto" e aequus "uguale")  
Il velût de pistagne al vûl taiât par sbighet.  
Il velluto della pistagna va tagliato di sbieco.

❖ **SBISIÂ**

v. = frugare con le dita; rimestare  
(voce in comune con il veneto; si ritiene riproduca il suono del ronzio e del frullio, tuttavia si segnala l'etimologia incerta)  
Cui aial sbisiât in chel scansel?  
Chi ha frugato in quel cassetto?

❖ **SBORFIN**

s.m. = spazzola con manella in saggina con la quale si spazzola i panni ed altro  
(voce onomatopeica)

No cjati il sborfin dulâ che lu vevi poiât.  
Non trovo la spazzola dove l'avevo messa.

❖ **SBRENÂT**

agg. = senza briglie, sfrenato  
(forma denominale forse del francese antico bris o bride, a sua volta dall'inglese medio bride "redini, briglie")  
A son fruts masse sbrenâts.  
Sono bambini troppo sfrenati.

❖ **SBROCÂSI**

v. = sfogarsi (letteralmente significa "evarsi a brocca")  
(dal latino broccus "dente che sporge", da cui l'accezione "cosa pungente")  
La fiere si è sbrocade sui lavris.  
La febbre si è sfogata sulle labbra.